



## **Aningaasaqarnermut Nunanilu Avannarlerni Suleqatigiinnermut Naalackersuisoq**

**Ulloq:** 16. januar 2020  
**J.nr.:** 01.31.06/20-00866

### **Aningaasaqarnermut Akileraartarnermullu Ataatsimiititaliap pingasunngornermi ulloq 8. januar 2020-mi aalajangiineranik Naalackersuisunut ilisimatitsineq.**

#### **2020-mut innaallagissamut, imermut kiassarnermullu Nukissiorfiit akigititaanik akuersissuteqarneq – Suliaq nr. 01.31.06/19 – 00866.**

” Naalackersuisut inassutigaat,

- konto pingaarneq 64.12.02 Nukissiorfiit-nut aningaasaliissutit koruuninik 7.500.000-inik amerlineqassasut, aamma
- konto pingaarneq 64.12.03 Nukissiorfiit, aqqusinermi qaammaqquteqarneq-mi aningaasaliissutit koruuninik 3.000.000-inik ikilisinneqassasut.
- Konto pingaarneq 10.13.10 Iluanaarutit, aktianik piginneqatigiiffinniit tunisinerillumi aningaasaliissutit koruuninik 4.500.000-inik amerlineqassasut”

#### **Aningaasaqarnermut Akileraartarnermullu Ataatsimiititaliap oqaaseqaatai apequutaalu:**

Aallarniutigalugu innaallagissamut imermullu akit 2020-imi allanngortinneqannginnissaanik inassuteqaat ataatsimiititaliamit tusaatissatut tiguneqarpoq.

Kissarsuutip uuliatortup atuussinnaaffia, aamma piffissap ingerlanerani aserfallatsaaliuinnermut aningaasartuutaasut allanngormata suliaasaqarfimmi akinik aalajangersaanagerup nutarternissaanik pisariaqartitsisoqarnerata eqqarsaatigineqarnissaa Naalackersuisunit inassuteqaatikku kissaatigineqarsimavoq. Qaminneqarsinnaasutut aamma aalajangersimasutut innaallagiat atorlugu kiassarnermut, kiisalu avataanit ungasissumit kiassanermut akit appariartitaaneramik nutarsaanagerup taassuma nassataqarsimanera paasissutissiissutigineqarpoq.

Qanoq annertutigisumik atuussinnaaffiit, kiisalu aserfallatsaaliuinnermut aningaasartuutaasut akit apparnerinut sunniuteqaqataasimanerat ataatsimiititaliamit paasiumaneqarpoq.

Oqaasertaliussani allassimavoq kiassarnermut akit uuliap akia kiisalu kissarsuutit uuliamik atuinnerminnut sanilliullugu atuussinnaaffii tunngavigalugit aalajangersarneqartartut. Qanoq kiassarnermut akigitinneqartup uuliap akiata kingullertigut ineriartorneranit sunnerneqarsimanera ataatsimiititaliamit paasiumaneqarpoq. Qanoq uulia atorlugu kiassarnerup allamik atuilluni kiassarnermit akikinnerutiginera ataatsimiititaliamit paasiumaneqarpoq.

Nukissiorfiit kiassarnermut akigititaasa appasinnerunerinut aningaasartuutit appasinnerusimanerat tunngavimusimassasoq ataatsimiititaliamit naatsorsutigineqarpoq, tamannalu tunngavigalugu konto pingaarneq 64.12.02-mut aningaasaliissutigineqartut qaffannagit

appartinneqarsimasariaqaraluartut. Qanoruna kiassarnermut akit apparneqarnerat kiisalu Nukissiorfinnut aningaasaliissutit qaffanneqarnerat imminnut ataqtigiittut?

Naalackersuisut paasissutissiipput pisortanit kiassarnermik pilersuinerup atornissaanut naleqqiullugu nammineq pigisatut uuliamik tunngaveqarluni kiassaasarnerup pilersinnissaa pisisartumut akikinnerusinnaanera pillugu Nukissiorfiit pisisartuisa akornanni annertusiar-tuaartumik sianiginnittoqaleriartortoq. Ataatsimiititaliap isummernissamut tunngavissiaq ima paasivaa, tassa tamanna Naalackersuisunut isumakuluutiginninnermik pilersitsisoq. Ataatsimiititaliamit ima paaseqqajaanarpoq, tassa atuisunik uuliamik kiassarnermiit in-naallagissamik kiassarnermut ikaarsaartitsiniarneq aningaasaleeqqinnissamut qinnuteqaam-mik matuminnga siunertatuaasoq. Allatut oqaatigalugu innuttaasunik akikinnerusumik kiassarsinnaasunik iluarsisummut qularnanngitsumik nunatta karsianut taamaalillunilu akileraartartunut akisunerusumut ikaarsaarnissamut pileritsatsitsiniaasoqarpoq.

Atuisut akornanni akikinnerusumik kiassarsinnaanermik ilisimasaqaleriartorneq ataatsi-miititaliamit ineriartornertut pitsaasutut isigineqarpoq. Taamaammatt ataatsimiititaliaq isu-maqarpoq Nukissiorfiit pilersuisussaataitanerminnik attassiinnarnissaminnik aallussisaria-qartut, tamatumunngalu aningaasartuutissanut aningaasaliissutit, unammillertinik nukillaar-saatinut imaluunniit atuisut nammineerlutik akikinnerusumik kiassarsinnaanerannik akiui-riarnermut atorneqaratik, tamatumunnga atorneqartariaqartut.

Nukissiorfinnut aningaasaliissutinik qaffaaneq ilaatigut konto pingarneq 64.12.03 Nukis-siorfiit, aqqusinermi qaammaqquteqarnermut tunngasumut aningaasaliissutinik appaanikkut aningaasalerneqassasoq Naalackersuisunit siunnersuutigineqarpoq. Illoqarfinni qaammaq-quteqarnermut aningaasartuutit tamarmiusut pingajorarterutaat (1/3) kommuninit kiisalu pingajorarterutaat marluk (2/3) Namminersorlutik Oqartussanit akilernerqartussaasut konto pingarnermi tassani allassimavoq. Tamatumani kommunit aqqusinermi qaammarsaanermut akiliutaat aamma appartinniarneqarnersut ataatsimiititaliamit paasiumaneqarpoq – tassa pisumi matumani 1,5 mio. kr.-inik. Konto pingarnermit tassannga aningaasaliissutinik taamak amerlatigisunik nuussinerup qanoq aqqusinermi qaammarsaanermut kingune-qarnissaa pillugu paasissutissinneqarnissaaq ataatsimiititaliamit kissaatigineqarpoq.

Tamatuma saniatigut ataatsimiititaliaq isumaqarpoq ingerlatseqatigiiffinnit Namminersor-lutik Oqartussanit pigineqartunit, soorlu pisumi matumani KNI-mit iluanaarutinik immikkut ittunik aallertoqassanngitsoq. Tamatuma saniatigut konto pingarnermut 10.13.10 Ilua-naarutit, aktianik piginneqatigiiffinnik piginneqataassutinut tunisinernullu tunngasumut oqaasertaliussani allassimavoq ingerlatseqatigiiffinnit Namminersorlutik Oqartussanit pigineqartunit iluanaarutit immikkut ittut Siunissamut Ungasinnerusumut Aningaasa-liissutissanut Aningaasaateqarfimmut aningaasaliissutigineqassasut.

Kingunerisassat ukiunut missiliorfinnut AIS2021-mi ilanngunneqartussaasut isummernis-samut tunngavissiami allassimavoq. Ataatsimiititaliap eqqaasitsissutigissavaa ukiuni tulliu-tuni aningaasaqarnikkut kingunerusinnaasut ilassutitut aningaasaliissutissanut qinnuteqaatini tamani allaaserineqarsimasussaasut.

Tunngavissiissutit matumani tunngavigineqartut tunngavigalugit akinik appaniarnermut pisariaqartinneqartunik nussuinissamut inassuteqaatit ataatsimiititaliamit akueriumane-qanngillat.

Kiisalu ataatsimiititaliap suliami matumani aalajangiinnermini isummernissamut tunngavisiami immikkoortoq Uunartorsuarmut tunngassuteqartoq pillugu isummernissani attuumassuteqartutut isumaqarfiginngilaa. Taamaattorli suliniutip oqaluttuassartaa, killiffia siunissaalu pillugit Naalakkersuisut nassuiaateqarnissaat periarfissaq manna iluatsillugu ataatsimiititaliap ujartorumavaa.

**Aningaasaqarnermut Akileraartarnermullu Ataatsimiititaliap aalajangiinera**

Siuliani allassimasutut oqaaseqaateqarluni Naalakkersuisut inassuteqaataat pillugit isummernissaminik Aningaasaqarnermut Akileraartarnermullu Ataatsimiititaliaq **kinguartitsivoq**.

Inussiarnersumik

Hermann Berthelsen

Aningaasaqarnermut Akileraartarnermullu Ataatsimiititaliap Siulittaasua